



partii naleraq

13.maj 2019

UPA2019/168

**Apeqquteqaat aallaavigalugu oqallinnissamik siunnersuut, Aatsitassanut Inatsimmi aatsitassarsiorluni ingerlatseqatigiiffiit nunatsinni qallorneqartut suliareqqeqqaarlugit nunanut allanut anninneqarsinnaanerannik piunasaqarsinnaatitaaneq atuutiinnassava. (Inatsisartunut ilaasortaq, Peter Olsen, Inuit Ataqtigiit)**  
(Aatsitassanut Suliffeqarnermullu Naalakkersuisoq)

Inatsisartuni ilaasortaq Peter Olsen Inuit Ataqtigiit, apeqquteqaat aallaavigalugu oqallinnissamik siunnersuuteqarpoq, tassalu Aatsitassanut inatsimmi aatsitassarsiorluni ingerlatseqatigiiffiit qallorneqartut suliareqqaarlugit anninneqartarnissaannik piunasaqaat atuutiinnassanersoq pillugu saqqummiussaqaarluni, tamannalu oqaaseqarfigissavarput.

Nunatsinni aatsitassarsiornikkut sutigut tamatigut isumannaatsumik ingerlaaseqarnissarput Partii Naleqqamit pingaartorujussuurtut isigaarput. Pinngortitaq minguitsoq erlinnartumilu najugaqarnerput pissutigalugu paarilluarneqarnissaa pisussaaffigaarput, minnerunngitsumillu avatangiisitta uumasut, naasut, imeq silaannarlu minguitsoq, pisussaaffigaarput illersussallugit.

Neriuppugullu aningaasarsiornissarput piinnarlugu uagutsinnut akigissanngitsugut, uagummi aamma akisussaaffeqarpugut, uumasorpassuit uumaffiat piaqqiorfiillu illersussallugu. Tassami sumiluunniit kuummi imersinnaallutalu paarnanik pukussinnaasariaqarpugut, sumiluunniit kuannertorsinnaasariaqarpugut, sumiluunniit nerisassatsinnik pissarsisinnaasariaqarpugut, akisussaassuseqartumik pinngortitamik paarsisimanitta ersiutaanik.

Nunatsinni aatsitassarsiornissaq akkerlerinngilarput kisiannili pisussaaffeqarpugut aatsaat illersorneqarsinnaasumik paaasoqarlunilu ingerlatsisoqarpat, avatangiisit illersorlugit peqataasinnaavugut. Tassami akuersaarnaviannigilarput mimgutsitsinissaq soqutiginnigitsutut illugu ingerlatsisoqarniarpat, aningaasarsiornissaq sukkasumik anguniannarlugu taamaattoqarniarpat qularissanngilluinnarparsi uagut Partii Naleqqamiit peqataanavianniginnata. Pinngortitarmi erlinnartoq kusanarluinnartorlu allanik taarserneqarsinnaanngimmat.

Nunatsinni aatsitassarsiortoqalerpat soorunami suliffissat amerlanerpaat aningaasarsiornikkullu iluanaarutaanerunissaa tamatta assortornaviannigikkippat qularinngilarput. Aammalu taamatut aalajangersaanissami kingunissai suussanersut ersarilluinnartumik tamarmik qulaajarsimanissaat qulakkiissallugu pingaarteqarluinnartoq oqaatigissavarput.

Aatsitassarsiornermi avatangiisit innarlerneqartarnerannik sumiluunniit takussutissaqartuannarpoq pingaartumik aatsitassat akuinik arrotsitsiniartarnermi, tassami taamaliornikkut avatangiisinut akoruutissarpasuit kuutsinneqartarput pinngortitamut innarlerujussuurtarlutik.

Taamaattumik ilumut eqqarsarluartariaqarpugut ilumut nunatsinni akuiaasernerit ingerlanneqarnissaat akuersarlugu pissanersugut. Isumaqarpugut Partii Naleqqamiit taamatut pisoqassappat tamanna kingullerpaajutinneqartariaqartoq, nunarsuup sinnerani akuiaaviit pilersinneqarsimasut atorluarneqarnissaat ammaffigineqartariaqartoq isumaqarpugut.

Tassami pinngortitami issittumi avatangiisit innarlerneqartarnerat ukiorpassuarni atasarpoq, innarliinissarlu annertoorujussuannorsinnaavoq, pinngortitamut, inunnut, uumasunut, naasunut, imermut, immamullu kingunerlorujussuarsinnaalluni, taamaattumik eqqarsarluarluta aalajangiinissarput saneqqussinnaangilarput.

Partii Naleqqamiit nalorninata isumarput unaavoq avatangiisit mingutsinneqarnissaat naggaarparput. Aatsitassat piiarneqartut akuiarneqassappata nunarsuup sinnerani akuiaaviit atuutereersut atorneqarniarlik, silarsuummi sinneranut aamma uagut akisussaaffeqarpugut taamaattumik akuiaaviit amerlisarneqarnissaannut peqataasariaqanngilagut.

Naggataatigut ilanngullugu oqaaseqarfiginiarparput aatsitassarsiornikkut sullissinerup sukkanerulernissaanik aatsitassarsiortut kissaateqarnerat paasilluarsinnaagatsigu. Uanilu Aatsitassanut Naalackersuisup ersarissumik oqariartuutaa Naalackersuisutut apeqqarissaarfigineqarnermini 8. maj pisumi aatsitassarsiornermi saaffissap isertarfiup ataasinnangortinneqarnissaanik saqqummiussaqaqarnera tapersersoratsigu.

Tassami aperineqarluni oqaatigimmagu inatsisartut inuussutissarsiornermut ataatsimiititaliaa isummerteriarlugu naqqissuserpassuk piaartumik Naalackersuisunut saqqummiunneqassasoq, suliarineqassasorlu aalajangiiffiusumik. Isertarfiup ataasinnaangornissaa, tassalu Naalackersuisoqarfinni marlunni suliarineqarunnaarluni Aatsitassanut Naalackersuisoqarfimmi suliarineqalissasoq. Tamannalu qilanaarluta utaqqissavarput matup isertarfiup ataasinnangornissaa Naalackersuisumit inatsisartunut neriorsuuttaammat.

Taamatut oqaaseqarluta oqallissaarisup saqqummiussaanut isumarput ersarissarparput. Qujanarlu Peter Olsen Inuit Ataqaigiit, saqqumiussannut soqutiginartumut.

Hans Enoksen